



**Aningaasaqarnermut Naalakkersuisoq**

**Aningaasaqarnermut Ataatsimiititaliap suliaq nr. 01.31.06/09-00451 pillugu pingasunngornermi ulloq 16. december 2009-mi aalajangiineranik Naalakkersuisunut ilisimatitsineq.**

**Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoqarfimmumut (KIIIN) ilassutitut aningaasaliissuteqarnissamik qinnuteqaat (Suliaq nr. 01.31.06/09-00451)**

**Naalakkersuisut inassutigaa,**

- Kontomi pingaarnermi 40.90.05-imi, Nuummi ilinniartut ineqarfiinut tunngasumi, aningaasaliissutit 616.000 kr.-nik amerlineqassasut
- kontomi pingaarnermi 40.01.14-imi, Ilinniartitaanermit qarasaasiaqarnermut tunngasumi, aningaasaliissutit 1.600.000 kr.-nik amerlineqassasut
- Kontomi pingaarnermi 40.14.10-mi, Nunatta Atuagaateqarfianut tunngasumi, aningaasaliissutit 1.000.000 kr.-nik amerlineqassasut,
- Kontomi pingaarnermi 40.60.13-imi, Kalaallit Nunaanni Ilageeqarnermut tunngasumi, aningaasaliissutit 1.100.000 kr.-nik amerlineqassasut,
- Kontomi pingaarnermi 40.01.04-mi, PPR-imut tunngasumi, aningaasaliissutit 1.712.000 kr.-nik ikilineqassasut,
- Kontomi pingaarnermi 40.10.15-imi, Atuarfimmu nerisaqartitsinermit tunngasumi, aningaasaliissutit 2.441.000 kr.-nik ikilineqassasut,
- Kontomi pingaarnermi 40.12.26-imi, Ilagiit højskoliannut tunngasumi, aningaasaliissutit 700.000 kr.-nik ikilineqassasut,
- IST-ip inernerat 537.000 kr.-inik qaffanneqassasoq.

**Aningaasaqarnermut Ataatsimiititaliap oqaaseqaatai**

Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisup ataani kontonut pingaarnermut ilassutitut aningaasaliissuteqarnissaq Naalakkersuisut suliami matumani qinnutigaa.

Kontomut pingaarnermut 40.14.10-mut, Nunatta Atuagaateqarfianut tunngasumut, atatillugu Aningaasaqarnermut Ataatsimiititaliap paasivaa Danmarkimi pisiortornermut immikkoortortaq 2008-mi matusimasoq. Matunerata kingunerisaanik 2009-mi aningaasartuutaanerussutit siumut naatsorsuutigineqarsinnaasimangitsut maanna oqaatigineqarsinnaanngillat.

Nunatta atuagaateqarfiata 2008-mi julip qiteqqunnerani utaqqiisaasumik ineqartitsinermit aningaasartuutai 30.000 kr.-iusut allaqqavoq. Paasissutissiissutigineqartut malillugit aningaasartuutit taakku 2009-mi julip qiteqqunnerani 800.000 kr.-it missaanniippat. Aningaasartuutit taama amerleriarnerat erseqqinnerusumik nassuiaatigineqassasoq ataatsimiititaliap kissaatigaa. Inuit qanoq amerlatigisut qanorlu atugassaqartitsilluni

utaqqiisaasumik ineqartinneqarnersut immikkut nassuiaatigineqassasoq kissaatigineqarpoq. Tamatuma saniatigut tamanna 2009-miinnaq ajornartorsiutigineqartussatut sooq naatsorsuutigineqarnersooq erseqqinnerusumik nassuiaatigineqassasoq kissaatigineqarpoq.

Aammattaaq aningaasartuutit Danmarkimi pisiortornermut immikkoortortap matunerata kingunerisai namminersorneq pillugu inatsit suli atuukkallarmat naalagaaffiup ataatsimoortumik tapiissutai aqputigalugit Kalaallit Nunaat taarsiiffigineqarnissamik piunasaqarsimanersooq paasissutissiissutigineqassasoq kissaatigineqarpoq. Taamaattoqanngippat tamatumunnga tunngaviusooq erseqqinnerusumik paasissutissiissutigineqassasoq kissaatigineqarpoq.

Kiisalu missingersuusiortnermut inatsit unioqquillugu aningaasat atorneqareerneranni aningaasaliissuteqarnissaq Aningaasaqarnermut Ataatsimiititaliap naluneqanngitsutut akuersissutigineq ajormagu qinnuteqaat una missingersuusiortnermut inatsimmi § 25, imm. 1-imut aamma § 1, imm. 3-mut tamakkiisumik naapertuuttoq uppersarsarneqassasoq kissaatigineqarpoq.

Aningaasaliissuteqarnissamik qinnuteqaatip matuma IST-p inernera 2009-mi 537.000 kr.-inik *pitsanngoriaateqartissammagu* naggasiullugu oqaatigineqassaaq. Taamaalilluni Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisooqarfiup aningaasaliissutit tamakkerlugit atorinissaat pisariaqartissimannngilaa. Tamanna naammaginarluinnartutut Naalakkersuisooqarfinnullu allatut maligassiinertut Aningaasaqarnermut Ataatsimiititaliap isigaa, tassa ukiup naanerani aningaasaliissutit (minnerpaamik) tamakkerlugit atorinissaat siunertaralugu pisuni taamaattuni Naalakkersuisooqarfiit atuiniapallattarnerat nalinginnaasuummat.

Aningaasaliissuteqarnissamik qinnuteqaammut matumunnga atatillugu Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisunit ilisimatitsissut Aningaasaqarnermut Ataatsimiititaliap suliaraa (Suliaq nr. 01.31.29-00179). Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisooqarfimmit (KIIN) Naalakkersuisooqarfiup aqutsisoqarfianut (KIIIA) aningaasanik Naalakkersuisunit akuerineqartumik nussineq ilisimatitsissummi taaneqartumi Naalakkersuisooqarfiup nassuiaateqarfigaa. KIIIA-mi sulisut tupinnaannartumik ilarpassui pisortatut atorfeqartut ilisimatitsissummi allassimavoq. Immikkoortortat assigiinngitsut aammalu naalakkersuisooqarfiup pisortanik atorfeqartitaqareersut ataatsimoortinneqarnerisigut KIIIA-p pilersinneqarsimanagera tamatumunnga pissutaasoq isummernissamat tunngavissiami allassimavoq. Pisortat atorfiit taakku ilaat akissaateqarfinnut appasinnerusunut allannngortinneqarsinnaanersooq misissorneqassasoq Aningaasaqarnermut Ataatsimiititaliap qinnutigaa. Taamaalillunilu sulisunik naammattumik amerlassuseqartunik tunuliaqutissaqarani pisortatut atorfiit attatiinnarneqarnissaat illersorneqarsinnaannngilaq. Suliassaqarfiup taassuma iluani pisortat amerlanerat Naalakkersuisooqarfiup ammasumik nassuerutigimmagu ataatsimiititaliamit iluarisimaarneqarpoq, tassa 2010-mi aningaasanut inatsisissatut siunnersuummi ataatsimiititaliap suliaqarneranut atatillugu apeqqut taannarpiaq Aningaasaqarnermut Ataatsimiititaliap uparuarmagu. Aningaasanut inatsisissatut siunnersuummut atatillugu Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisup suliassaqarfiani allaffissornikkut annertunerusumik sipaaruteqartoqarnissaa ataatsimiititaliap siunnersuutigaa. Tamanna Inatsisartut akuersissutigaa. Pisortatut atorfiit taaneqartut allannngortinneqarnissaat allaffissornikkut sipaarutissat taakku ilaattut ingerlanneqarnissaat naleqquttutut ataatsimiititaliamit isigineqarpoq. Taamaattumillu periarfissamik tamatumunnga Naalakkersuisooqarfik toqqaannannngikkaluamik nammineq atorluaalersarmat ataatsimiititaliamit assorsuaq

iluarisimaarneqarpoq.

Naggasiullugu ataatsimiititaliap oqaatigissavaa suliaq manna ulloq 12. november 2009-mi Naalakkersuisunit akuerineqarmat. Suliarli aatsaat ulloq 10. december 2009-mi Aningaasaqarnermut Ataatsimiititaliamut nassiunneqarpoq. Allaffissornikkut kigaalaarussineq taanna naapertuutinngilluinnartutut Aningaasaqarnermut Ataatsimiititaliamit isigineqarpoq.

**Aningaasaqarnermut Ataatsimiititaliap aalajangiinera**

Siuliani allassimasut piumasaqaatigalugit tunngavissaatillugillu Naalakkersuisut inassuteqaataat Aningaasaqarnermut Ataatsimiititaliamit **akuerineqarput**. Oqaaseqaatinut siuliani allassimasunut Naalakkersuisut akissutaat kalaallisut danskisullu kingusinnerpaamik ulloq 9. januar 2010-mi nassiunneqassasoq qinnutigineqarpoq nuutinneralu qarasaasiakkut uunga nassiunneqarluni: [nch@inatsisartut.gl](mailto:nch@inatsisartut.gl).

Aningaasaqarnermut Ataatsimiititaliaq sinnerlugu

Naaja Nathanielsen

Aningaasaqarnermut Ataatsimiititaliap siulittaasua